

方山薛先生全集

方山薛先生全集卷五十八

詩

五言古

昭君怨

妾貌苦不知妾命苦不逢對鏡理紅粧自謂冠後宮
日望君王寵寧知賂畫工丹青一失真鬟膩成飛蓬
掖庭未召見妍醜按圖中枉教殊絕姿萬里去和戎
登車出國門玉筯垂雙瞳灑泣長城闕塞草煙濛濛
行行復轉盼黃沙高接空纒首復褫足颯颯悲胡風
追想毛延壽立心良亦忠豈爲傾城國驅之羊犬叢

不知妾有心不與褒驪同妾身不足惜妾心還自恫
但願漢天子自茲愼厥終百度尚稽閱毋爲左右蒙
門有車馬客行

開門向城隅城中通九衢紛紛車馬會日夕相馳驅
羽蓋颺金碧文裘紆紫朱旌旄向前導後擁兜鍪趨
一言衆然諾叱咤恩威殊嗟彼鶡冠子深山被短襦
著書數百言空白腮上鬚木食仍弗充皮骨日就癯
姓名不肯傳寧爲世網拘人生各有志奚必同所須

書舜村卷

我懷有虞氏遙望九疑山重瞳不可見玄德邈難攀

洛陽有高士玉骨丹砂顏結廬倚丘壑遁跡木石間
鼓琴振逸響畊稼聊自閒居人名舜村道化相與還

贈朱子价

美人淮南來貽我瓊瑤篇扣之作哀玉引被清商絃
忽復渡江去揚帆凌紫煙臨風愴然別佇立還自憐
况當三五夕皓月生嬋娟盈盈媚河漢對影成留連
豈無新相知故舊情獨牽折葵製團扇置子懷袖前
采蘭結芳佩繫子衣帶邊如彼遠行邁勿爲中路捐

石佛閘阻風

長堤暗垂楊濟水流湯湯行人朝復夕仰睇參與商

前月在長安今歸指故鄉道遠未即至願隨高鳥翔
不能生羽翼戀茲冠與裳松舟檜爲楫倚徙河之梁
風高不可渡怛焉激衷腸

宿招慶寺程仁和后岡龔錢塘時際尤郡博
廻溪秉燭攜尊招飲湖上

投止人天界山溪凍草封鳥窺簷下宿僧定不聞鐘
蕭索傷孤獨尋幽興未窮鄭虔攜卓魯並輦入林中
雪夜人蹤滅氷湖燭影紅清尊候逋客真意自相通
曠達懸河論孤危蹈海風更深猶未散澹月下踈松

答鄭生伯源

屏居謝吏事屬茲春晝遲平生罕遭遇年來數更奇
抱病日偃息疇與同襟期空階滿青草晴旭照游絲
羨子英妙質皎皎玉樹枝閒情理墳索雅志窺黃義
相看慰寂寞時出瑤華詞憶昔楊子雲多爲世所蚩
賸有河東賦吹噓欲待誰蕭然草玄室唯賴侯芭知
登樓見麻姑山雙瀑

屏居悄無事雨霽雲霧開登樓一瞻眺麻姑鬱崔嵬
飛瀑正交馳日影相昭回奔流出霄漢皓若銀河摧
分明織女練搖颺青冥隈忽如雙白龍躍出灩澦堆
造化本奇勝神功莫浪猜豈亦厭世濁留此滌塵埃

余生本不類樸樛非良材所如輒難遇觸景空徘徊
因懷孫楚賦更憐王粲才鄉關隱在望長思歸去來

夏至

夏至值恒暘一陰潛已生靜居感消息轉覺意慮清
灑然會玄化觀物忘枯榮偶憶去年日散齋出留京
攜尊登木末亭名解帶集羣英今夕復何夕乃在盱江
城委身任流浪汎汎江海萍鷗鷺狎不起舍席憑自
爭寒暑本相禪寧爲寵辱驚

對桂樹

桂樹鬱蒼蒼清陰覆北窓夏日聊偃息風動生微涼

頽然解襟帶晝長時坐忘山鳥忽來鳴宛轉如笙簧
反舌已無聲羽族莫能詳誰云解人意故爾相迴翔
物性各自適豈因增感傷

喜雨

盱江農事早五月稻苗秀旬日值恒暘含英苦炎晝
田廬屢遭歉罹茲皆疾首祭禱徧山川渰然靈雨驟
新水蒲畦壠郊原盡黃茂始知造物者終不遺遐陋
雨後池蓮盛開

山雨夜來集曉看池水盈紅蓮含露滋忻忻齊向榮
憑闌聊自玩默會濂溪情輕颺散芬馥逾覺煩襟清

次韻答馬谿田

一從睽隔後世路多苦辛所如寡諧合敢謂秦無人
蓬蒿沒舊里仰睇參與辰關西有老子一劄抵千鈞
唯以敦宿好不投要路津相期亦何有但願全吾真
再三問頽俗可復能還醇

獨坐

獨坐盼庭柯青暘柰若何花開曾幾日片片點清波
世路轉危迫人情各荷戈壯心空自在衰髮已無多

送張司訓歸臨海

九月發菱溪十月渡前塘江空沙鳥白江寒霜葉黃

蕭條舊書劒蚤晚達故鄉官豈在卑峻道須慎行藏
白駒賦周雅皎皎山林光

送馮給事謫潛山

行行重行行之子去何方風高秋色寒河梁露爲霜
蔓草忽已萎饑鴻哀稻粱我有夙素懷耿耿疇與將
願持三尺劒繫君衣帶旁願驅千里車與君共翱翔
曉迎旭日赤夜戴明星黃東臯復南陌誰謂道阻長
矢言竟所趨勿臨岐路傷

題雲溪卷

雲影落清溪幽人謫古辭不作上林賦惟慕桐江絲

蕩漾憑短櫂夷猶挂青藜有時發長嘯驚起雙鷗鵠

題彈琴圖

嶧陽有佳木誰取被朱絲刻羽鳴玄鶴清商泣楚姬
臨邛羞解調子夜厭新辭不辱王侯召令人憶戴逵
次王行人雪中見寄韻

閒門封凍雪官與病相宜正藉袁安枕俄傳招隱詩
庭陰下衰草窗影落疎枝王戴風流遠何人過剡溪
新春同劉白石憲副游雲居菴次韻二首

空門澹日夕閒雲自來往春寒雪未融新晴愜游賞
解帶陟崇岡湖山鬱蒼莽分明玉芙蓉削出仙人掌

僻性與世殊凌風起遐想願與同心侶相攜滄海上

二

曉起尚霜霰停午漸覺和入寺一閒適幽懷對松蘿
因之悟淨理萬有空自多翻彼羣飛鳥百轉若解歌
觸耳宛律呂焉辨是與訛留戀竟何心久坐山之阿
九江府官謂余所寓小學逼於兵備公署促
改別館

大樹曾見伐鷺鳥斯不羣孔父與屈子千載唯斯人
我生本不類素志甘賤貧所如輒不遇茲情難重陳
羨彼栖林鳥一枝足容身

題畫次陳鳴野韻

空山悄幽獨攜筇出深樹隱隱若有聞漁歌在何處

送徐生渭

與子十年別忽復見子來言將渡江去北上黃金臺
霜飛木葉下黃風吹塵埃願子慎步履服食還自裁
詠老少年

庭前有草名老少年因賦此

少年人易老汝稱老少年天然一小草造物何獨偏
品題屬誰口看來良亦然參差植庭下高下相新鮮
逢秋根幹盛經霜色愈妍縱不類芝蕙猶得兒童

我今七十二志意不改前舊游旋凋落衰髮垂兩肩
彼美清揚子馳逐相後先見我輒趨避謂我老且顛
昔人不足法交口自稱賢未肯實努力時日空遷延
不覺亦老大吁嗟是誰愆後人視此輩不知又何言
疇與此草比感之成短篇

方山薛先生全集卷五十九

詩

七言古

題桃源圖

桃源之水清且漣桃源山中多列仙憶昔秦王急徵
役長城橐杵聲喧闐關中羣盜滿山谷東方使者還
謾言相攜來作辟世人茅屋春風幾歲年丹霞綽約
洞天曉林梢果結如瓜棗蒙茸書帶白雲間垂垂玉
露松花老懸崖削壁真絕奇紫芝路口無人物張良
不用黃石編東園豈解郎官好古來多少英雄客不

及春花與秋草只恐漁郎來問津落花洞口還頻掃

贈沈生

子瞻文章泉萬斛介甫作字如忙中所以梓人稱大
匠敝牀闕足求他工沈生溫淳學真跡我製彼書相
爲功但恐虛車不堪載案篇箱牘紛雕蟲願言努力
追渾灝勿俾勞爾終無庸

德慶山房與諸生夜坐

山窓惟汝二三子謾對青尊剥梨棗燈盡更深僧未
歸月明絡緯悲秋草

與周子垂華近卿同寓偶爾感賦

城上秋風吹落日城邊美人鼓瑤瑟嫋嫋餘音黃鵠
歌游子聞之欲於邑憶昔尋芳學少年青絲絡馬腰
垂秘不數三春遊冶郎自言我有封侯筆賦成未獲
獻甘泉空向樊丘守蓬華賈生已上治安書孔明猶
抱隆中膝周賢華子才最奇只尺風雲生咤叱憐予
寂寞日追隨行囊常負書千帙開卷分明見古人早
達晚成何足恤

六龍歌贈華生坊

六龍城濠秋水發與子同舟望吳越高高下下縈巖
壑秀氣盤旋挺英拔人云長才西北生地脉從來有

變更楊州貢賦今上上泥塗已擅膏腴稱汝兄文章
時所推子貌稜層堪與京願言努力振華閥少年寰
海皆知名

贈秋霞道人

亂雲飛盡秋山碧萬疊空青俯危石扶疎老樹懸蒼
藤仙侶雲車下丹室蹁躚白鶴脩羽翰萬丈流霞滿
天赤林梢盤旋覆蜀錦龍虎生煙人不識昔人常欲
從之游羨子青年能脫迹我亦潦倒厭塵寰孤鷺凌
虛邈難即

江南行贈華從龍北上

江南二月春色濃桃花杏花相向紅佳人爭試越羅裳
游子倒跨連錢驄華君生長錫山下原是江南好
奇者蚤歲先從邵子游此時獨得還心解十年文賦
馳海邊倒傾渤海波濤瀉爾來囊書負鐵硯萬言欲
獻承明殿西京賈董是何人別我謂我何足羨英雄
相遇恒蹉跎馮唐未必輸甘羅君言慷慨我懷壯舉
觴酌君還復歌咸陽道上終軍繻司馬遨遊賦兩都
君今一去三千里漢柳燕雲拂行李別時還期見時
喜長安道上春風裏

聖人出

聖人出天下平先朝預兆黃河清制禮作樂周道成
明良喜起康哉賡百獸率舞鳳皇鳴千秋萬載流英
聲

贈別孫培之

昔年何時與子識燕臺春暮黃金闕今年何時與子
別秋風煙水秦淮月人生聚散各有時高歌且盡玻
瓈卮興公文章奏金石天台作賦誇雄詞九華山頭
暫棲息天涯萬里遙相思相思相見應何地竹梧披
垣花倩麗

寄泰和曾子龍

一別秦淮悵今昔東風兩度楊花白不見西江尺素
書瞻望令人空歎息匡廬山高白鹿深夜靜燒藜讀
周易南溟浩渺潛鷗鵬九萬扶搖暫栖翮我在荆山
拾砮砮出獻渾驚鹿臺壁金門楚客目如星一見知
非漫投擲蒼顏不是賈生年俚辭詎謂劉蕢策君應
自信莫相疑少微已照東西掖

詠懷呈座主任五岳

憶昔深居方茂山柴荆盡日常閉關簾幃雲霧自生
滅曲磴縈紆花草斑談玄夜倚石臺月憑虛晝俯清
溪灣有時滌硯汲寒水隔籬忽起雙飛鵬况復追陪

聚巾爲芰荷寬博歡呼間于時不識王公貴自誇別
境非塵寰由來此樂不可極忽恨無知常慚顏出門
驅車向京國黃風吹沙青鬢髮東西狂走成汗漫側
身懊惱悔不還莫邪縱遇風湖子荆石未成蒼玉環
朝來開鏡發長嘯乾坤濩落誰同調五陵豪貴意氣
揚青絲絡馬泥金轎夾道奔馳爭取憐託身謂可登
樞要汎觀繽紛多此曹洛陽從是輕年少嗟予未敢
負相知更恐北隴終騰笑

鄭廣文行送沈丘鄭教諭

鄭廣文少年曾空才子羣邇來獻策不得意領符曉

發燕山雲囊書策馬向何處行人遙指陳州去廣文
官冷祿更微我獨勸君無不豫青衿擁座蘭花開白
日遲遲照閒署不聞嫖姚馳羽書不上相如諫獵疏
案頭文草盈縹緗俯仰歌吟自容與鄭廣文古來英
雄君不聞洛陽已作長沙傳廣川還相江都君當時
丞相御史臺金印緋衣氣燄薰百萬生靈懸掌握顛
倒人才任揮霍祇今唯有北邙山黃土丘荒青草灣
富貴榮華眼前事五侯七貴應何意史冊文章照人
目大書賈董千行字鄭廣文又不聞春秋時楚伐陳
狐丘一克飛煙塵炎都已失神農舊居人非復胡公

民土地依然經幾變 孝皇重建沈丘縣四十年來
文教新今日須君作羣彥古今興亡已如此官秩崇
卑何足眷我亦長安游宦人慷慨興歌爲君餞

秋夜讀秦漢文

星河歷落秋夜涼城上銅壺漏轉長客窗秉燭不成
寐簾前霧重侵衣裳獨坐無依翻古籍我思古人更
蕭索姚姒心神未易窺秦漢文章尚標格染翰名家
盡少年落語奔騰人辟易英雄未可笑毛錐叱咤風
雲迴劒戟空談誤國固有人聊城射書豈游客山東
制詔亦文字扶杖聽之泣頭白脩詞動物類如此采

色光芒照金石馬遷去後相如死烏啼花謝揚雄宅
潦倒詞場和者誰掩卷令人悵今昔

七夕歌

去年七夕在金陵今年七夕住燕京旅人舍館易南
北偏西涼月依然明忽憶前人竹樓記去國懷鄉無
限情人生蜉蝣寄天地何必感嘆黃州城秦淮厭聽
后庭曲今宵何處彈秦箏井梧搖落秋色寒銀河皎
潔零露溥仰天莫問牛女會烏鵲聯翩空羽翰不獨
天邊參與商更有人間行路難旁蹊迅疾不可涉欸
段周行更兢業試向天孫欲乞巧風起長空亂飛葉

君子有所思行

景屬昇平運年來感物華掖庭傳樂府沙塞息胡笳
將軍解甲盛統綺爭誇佩玉矜朱紫羞騎戰馬出團
營願共儒生論書史才士援經訟禮文盈庭章䟽何
齷齪獻詩奏賦更奇絕一時枚馬紛如雲洛陽少年
長太息絳灌不容空切直濟南素具請纓心徒步入
關人未識况懷漆室杞人憂迂濶無稽誰信得

隴頭水

隴頭流水聲濺濺隔隴胡人候月圓獨苦防秋深夜
卒霜風凍草不成眠

戰城南

戰城南多斬獲，彎弓北向匈奴射。馬前忽仆左賢王，
百萬氐裘齊落魄。長驅直入過天山，掃穴犁庭快疇
昔。平生自分死邊野，一腔血灑胡沙赤。憑將腐肉啖
烏鳶，不望裹尸從馬革。今日分明仗主威，豈敢貪天
受勲冊。歸來脫却戰時袍，長往深山煮白石。

雉子斑

雉子斑，罹于羅。性耿介，憂偏多。羽毛蒙茸，日憔悴。五
采文章，柰爾何。越裳重譯獻白雉，漢世披圖競作歌。
不然素質無華，何足奇。一朝創見翻可嗤，君不見楊

生太玄亦尚白當時自是少人知

長安有狹邪行

漢家臺殿鬱嵯峨晴霞彩霧連銀河宮牆嚴邃未易
窺中有白玉黃金坡晨昏出入貴游客九衢馳道相
經過香車寶馬人辟易唯聽珊珊鳴珮珂洛陽賤士
道前立仗劔挾策披青簑自負高才空一世不數文
學明經科冀將薦引即召見亦云屈少伸還多仰容
昂肩不一顧殺身難贖羞前呵青絲白馬誰家郎萬
貫腰纏意氣揚慣熟長安狹邪徑往來時向城隅旁
城隅有樓高百尺綺䟽玲瓏漾朱碧內設流蘇合歡

帳錦鋪翠被明瑤席繁絃急管侑芳尊曳袖低鬟宴
朝夕從來交結五陵豪締姻許史金張宅郎君托身
登玉堂石渠金馬衿揮赫讀書不辨魯魚文何用九
丘并八索始知徑步成速化自笑規行翻跼踖

童太史避雨玄寧寓所自言日昃未食欲得
麵飯因索題詠率爾作歌

童太史自何來長安風雨飛塵埃南中孤士掩玄寓
槐陰滿院生青苔太史衣裳濕如澡扣關剥啄連呼
開卸鞍據牀索麥飯充饑不擇蒿與萊少陵粗糲自
可飽始知富貴憐珍瑰童太史汝最文自昔才華天

下聞漢廷遷固真儔匹六朝兩晉難爲羣搜玄獵奇
午未食九衢策馬何慙勤嗟余屢爲東閣棄凡材不
是詞林器五侯齊薦飯牛人詎云狗監無揚意童太
史豈不知李廣難封數本竒良將之才尚如此一介
書生安足爲

贈吳陽谷

安陽山中春可憐安陽山人顏色鮮一生唯愛讀黃
老煙霞麋鹿相周旋乘閒採藥徧深谷蒼松白晝觀
流泉牛車出入長安市一卷方書肘後懸都人指說
韓康伯杖頭常挂青銅錢玉壺沽酒不獨醉學士文

人滿四筵曠達如君真大隱人生何必空逃禪

黃河行

黃河之水天際來排空濁浪何崔巍白晝蛟龍鬪風
雨驚濤洶湧聲如雷憶昔神禹分九道奔流到海不
復迴中國安居免魚鼈烝民粒食人文開九河湮徙
自何年積石龍門皆變遷華陰砥柱及孟津大邳洛
汭茫無邊崇山巨礪不能限遂令沃壤淪深淵漢世
曾聞瓠子歌宣防築塞徒流傳三策無如賈待詔當
事不決仍拘牽吁嗟洪河民命懸沿河州郡誰能捐
上下千年盡因襲嗟余過此空潸然何必窮星宿海

何必辨昆侖山 聖人元自河清出但願四瀆效順
無后艱

錢生行

錢生自是東吳才長河喬嶽成胚胎虹霓爲氣玉爲
骨藍田日暖光昭回二十年來未遭遇條然抱璞虞
山隈遲城高價不易售蒙塵闕寔還蒿萊相如原非
入貲客賓戚豈是飯牛材東游會稽覓知己振衣慷
慨登高臺我學王喬居海上白鳬朱瑟相徘徊一朝
覲爾談夙昔春風澗水蘭花開白頭傾蓋何足問意
氣相忘便投分君不見鄭子當年見馬融至今北海

馳聲聞又不見孔融慙勤交彌衡憐才豈爲年相近
英雄曠世尚感孚何況生同百年運獨恨茲辰隔吳
越相思那待梅花發錢塘江頭夜潮起何不即放姑
蘇筏凌空直上南嶽巔同躡天根探月窟一葦輕航
萬里流更從滄海窮溟渤

渡曹娥江

父溺竟何往女心痛自呼籲天天不應祝江江不枯
委身逐江死庶以隨父軀吁嗟孝娥多苦辛終天之
恨誰與陳荒祠寂寂向江水殘碑賴有邯鄲淳過此
自然堪下淚況復飛花慘暮春

登會稽山悵然懷古

會稽山何高峻古來已作揚州鎮蒼冥秀色開青蓮
削出危崖利鋒刃遠近諸山斷復連環拱分明皆效
順憶昔夏禹東巡狩坐臨方岳朝羣后金章玉帛競
趨蹌揮霍車旂徧巖岫防風後至速天誅一振聲威
昭宇宙後來却生秦始皇自謂功德猶相當東游到
此壓王氣求仙采藥尋竒方李斯文章亦奇絕大書
刻石何誇張千百年來思往事造物鼓人真若戲禹
穴藏書已塵跡妖魔無復長人至雲物淒涼秦望山
剝落碑文磨篆字何況蘭亭剡水人勝事沉淪無足

異不堪最是宋諸陵冬青樹下空垂淚

題蟠桃圖壽秦中丞母

東海有山名度索危崖峭壁芙蓉削上有僊人來種
桃云是玉衡星散落根株盤屈三千里碧葉扶疎花
綽約垂垂結子著枝端采之可作長生藥玉妃捧盤
金母筵紫文綳核蜚青雀雲裳飄飄九芝蓋白霧丹
霞光閃爍滄溟弱水隔塵寰畫工圖入中丞閣中丞
有母八十年脩儀整度容如昨隆恩異數出雲霓玉
冊金書照花萼我昔飛鳬來海邊公家和氣偏磅礴
尋幽西入匡廬山更向階除聽鳴鶴鶴鳴風清江水

平彩衣拜獻高堂爵縹清玄碧旨且甘香芬琬液瓊
蘇酌青煙朱火熏蘭膏筦絃鐘磬還歌嘏祥氛瑞靄
襲簾櫳王母分明下寥廓翠翹舞鳳儼晨嬰交帶靈
飛綬連絡珊珊緝御珮環聲翟羽交馳供燕樂古稱
羸女吹洞簫又聞湘娥佩蘭若始知人間自有真披
圖何必求冥漠

滄峽行

滄峽之石多廉利滄峽之水多急湍海風吹雲動地
起炎荒倏忽生嚴寒扁舟牽纜行不得獨客停杯還
自歡憶向新秋經此峽晴空萬嶺芙蓉插順流直下

三山城千里長途疾于翼行路非難亦非易造物鼓
人真若戲君不見太行巫峽稱險巖推車覆舟容有
時平流大道無回互含沙射人人不知我今天涯憑
去住荒村薄暮聊棲遲明日陰晴未須問呼童且罄
玻璃卮

對雪柬陳郡推

江州冬月多雨雪江民老稚衣百結茅茨織婦急輸
將灑淚不言空迸血阿姑無食還苦寒兒夫逋負遭
縲絏昨日晴明稍覺溫天又將陰蟻出垤人言穴處
能先知不知泥封凍欲裂我生本亦類蜉蝣越水楚

濱真瑣屑氣蒸雲夢萬尋虹羞包五斗淵明節門外
空憐冕服榮燈前欲擊珊瑚折長風吹散匡廬雲霰
電空中旋消滅朝攜童冠登高臺白晳青衿歌激烈
但願四海回春陽桑麻徧野聞啼鳩祇恐大火復南
流赤日飛空更炎熱

西蜀歌題戴侍御卷

豸冠御史歸京闕羣黎爭擁前驅卒願言驄馬且蹉
跎聽我臨岐西蜀歌蜀山通道自何年金牛五丁還
浪傳蠶叢魚鳧號開國望帝去後空聞鵲吁嗟此地
亦奇域嶮巖窮僻真難測峨眉削出青芙蓉南廣溪

頭水流黑劒閣崔嵬高插空石門盤阻渾鐵色雙江
三峽激迴湍支川百數難辨識吐著蠻獠接封壤烏
撒烏蒙競雄長寧番越舊半夷人松潘疊溪多罔兩
年來芒部屢勤兵芻輓樵蘇盡鞅掌 君王赫怒命
將軍玉書分閫將禽斬值茲恒陽地如炙沃野翻成
千里赤饑民蒼皇坐嘆息四顧無禾更無麥屠沽惡
少嘯成羣軟血盟心從暴客使君日夜抱殷憂相度
機宜運籌畫封章懇上賑饑方綏和再獻平戎策
天子臨軒語近臣御史之言盡肝膈大盈揮金二十
萬易糧往給溝中瘠流亡田舍起炊煙鴻鴈哀鳴復

安宅綸音更召將軍還繡斧謀猷真絢赫遙臨赤水
御戎衣布悃聲威觀順逆遠人相率縛渠魁拜獻霜
臺手加額國體尊嚴號令明依稀干羽三苗格不聞
太白蜀道難不數相如諭蜀檄寢兵發粟不踰時百
萬瘡痍登衽席今茲歸去黃金臺青蒲白筆真悠哉
禁掖快瞻名世士遐荒還戀濟時才

贈別李少虛

潯陽自昔多流客天寶年間稱李白昨余偶向會稽
來匡廬千朶芙蓉碧經年不見謫仙才煙霞空護幽
人宅荷衣毳褐杜門居花落花開聊自適郢中之歌

和者誰下里巴人空調卑一朝忽覩南豐李鳳毛玉
樹丰神奇投余采箋長數丈星雲煥發琳瑯辭引商
刻羽屬知音流水高山相對吟人云白也詩無敵我
謂君才亦難覓中郎倒屣伸宣迎老瞞何須妬禰衡
登樓鸚鵡雄詞賦藝林千載馳芳名江州司馬白樂
天與君友善稱忘年留君信宿君且去琵琶亭上開
離筵君來別我愁分袂明日相思岐路邊

蟠桃圖爲齊訓導題

仙人種桃昆侖西凌霜結子丹如霞盤崖絕磴不可
度瓊枝僅容青鳥栖武皇好事欲長生上林承露當

空擎文成五利皆拜爵咸陽咫尺通滄瀛久之術窮
技亦盡始知二子徒虛名東方待詔一儒者詼諧託
隱金門下三竊瑤池千歲桃東郡人言真復假勝事
流傳千百年祇今畫史猶摹寫我愛懷安齊博士文
章丰格俱清雅滿堂壽考世所希白日煙花開綠野
丹青瀟灑隔塵寰拜舞斑衣傾玉笋人生得此乃真
樂紛紛何必誇金馬

題夏中丞松泉卷

蜀山高懸紫霄長松秀色凌嵯峨青葱盤鬱飛偃
蓋天風四起鳴箛韶黑潭莊上人如玉蚤歲看花曲

江曲溥施霖雨徧蒿萊開圖時復瞻林谷幽懷愛松
還愛泉欲向人褰洗塵俗涪州城西築精舍蒙泉迸
石涓涓瀉紺寒真可豁煩襟涵虛滉漾浮臺榭銀魚
金帶寵方新種松鑿泉誰復暇翛然逸思摩蒼空飛
鳥游魚昭上下對時育物日悠悠貞幹清漣相慰藉
桑子木謫戍潯陽適余將東歸賦此貽之

楊州才子舊知名相逢却在潯陽城鐵髯霜面殿中
直灝氣凌秋橫紫清手持三尺鏌鋁劍高歌一曲從
軍行解脫繡黼擁金華自誇素習穿楊射有時吐出
胸中奇彭蠡匡廬漾文碧丈夫到處足歡娛夷險窮

通皆順適嗟余前年亦獻策出走風塵真落魄浮名
自累苦不知空向人間甘跼踖浩然歸去舊田廬草
衣仍作山中客逢君未久卽辭君搔首踟躕悵離陌
更惟服御慎支持賜環飛白應朝夕

湘江歌送陳給事之湖南叅議

湘江秋深萬里碧涵虛漾空渾一色霜飛月落曙光
寒遠近離離楓樹赤穹窿王氣閃雲霓東來直與鍾
山齊中聯五溪作湯沐省肆時復鳴金雞邇來役繁
急徵調丁壯頻年勤募召旬宣岳牧是何人使君遠
向湘江濱吁嗟使君名諫臣囊中疏草皆精神我從

秦淮竊窺得知君抱此良苦辛茲挽湘流沛膏澤文
章豈必瀛洲客橫金不是賈長沙作賦何須憑鵬臆
興到還登黃鶴樓長安北望江悠悠

周子垂母八十賦此貽之

高堂戲綵開華席婺星光芒射南極伶人吹徹紫簫
聲仙侶翻飛青鳥翼賢哉周母介中壽皓首修眉玉
爲色獨室含貞四十年麻枲篝燈勤內職孱然愛子
方弱齡教訓知勞追斷織我昔橫經蕭寺陰布衣江
湖人未識歲遣游從不憚煩盤飧時餽淮陰食一朝
仲子登賢書我亦隨侍金鑾直往事回思廿載餘彼

此零丁漸培植母今老矣日歡娛上壽未涯真自得
玄清混沌亦何心昭曠分明眷潛德慚余薄宦馳四
方長饑未效千金力聊歌一曲游仙辭乘風遠寄瑤
池側

雲亭歌

白雲亭在松之鳳凰山上控臨三泖晉二
陸嘗游息焉侍御李君家食時讀書其中
因號雲亭吳門文待詔爲之圖方山薛子
歌于其上

晉室風流競馳逐太康末年稱二陸遨遊時向鳳凰

山白雲縹緲攢林麓一亭空翠倚高岑三泖涵虛
閃倏鍾英翕秀奪天工吐出珠璣千萬斛機雲去後
復如何華亭鶴唳空悲感悠悠千載竟何人石壁蕭
條多草木一朝李子奮雲間步入亭中豁心目曾襟
獨負三吳奇萬卷宏開讀書麓青春作賦獻明光
天子臨軒親賜錄敷天誕布好生仁首命齊東理刑
獄白雲出岫沛甘霖品類羣生各沾足忽復徵書下
密勿召汝從龍作神物飄然乘風來帝鄉天上需雲
昭炳蔚有時行部去簷帷鐵面豸冠還繡黻經綸日
補衮衣裳照臨萬國垂明堂應是晴雲作霞氣頓令

五色成天章金門待詔真畫手
縑素方圍僅盈斗揮毫落染妙入神
真水真山那復有獨憐白雲同此亭
鳳凰海上依然青今古才華不同遇
浩歌變鸞橫滄溟

秦淮歌送張大名

秦淮水向長江注楊白花風暗江樹
草色遙連六代宮天外孤雲憑去住
遠近青山遙晦明俯仰乾坤盡流寓
送君江頭勸君酒痛飲高歌扣銅斗
丈夫事業在及時多少青年空白首
我獨愛君才出羣脩辭上誇秦漢文
胷中素負經綸學慷慨不數麒麟勲
昨從

北闕下除書一朝出守天雄軍古來此地常征戰沙
麓山前多陣雲即今承平銷劒甲鴻溝白馬皆耕耘
太守此行作保障循良應出潁川上蜀中教化頌文
翁魏郡禮樂今何讓獨恨石頭還虎踞鳳凰臺空才
子去當年李白憶玄暉建安氣骨真難遇秦淮之水
日夜流此意難從外人語

點蒼山行爲趙雪屏尚寶賦

點蒼山高控南壘霄漢青冥飛秀色下亘厚地數百
里上有泉源深不測迴旋相向十九峯每峯噴瀑懸
其中浩淼沿匯十八溪溪流一色涵晴空崔嵬倒景

極變態銀河錯落金夫容洱水涓涓自山後繞出山
前愈延袤天鏡宏開千頃光四洲三島渾如甃龍頭
龍尾兩關雄井絡坤維天造就憶昔漢武開西南將
軍入關百戰酣羽檄流傳盡尚武歷年聲教猶未覃
蒙段因仍遂竊據土田稼穡空肥甘明興禮樂徧寰
宇此山自是滇南主效靈獻瑞產才賢不獨崧高降
申甫趙子神清性好文二十作賦窺皇墳讀書夜對
泉池月採藥朝乘石洞雲更愛高峯多積雪六月生
寒洗炎熱相看自爾會心期世慮都忘肌骨澈偶來
獻策登玉堂天子親除考部郎計弊羣吏明殿最

大行黜陟張王綱抽身便爾作南官符卿居傍秦淮
千杜門優游竟無事披圖宛見雪峯寒出游時上鳳
皇臺載觀虎踞蛟龍蟠山水幽奇何處無此意如君
良獨難

賦得玉門關行送少司馬鐘石先生北上

玉門關頭羽書至報道胡兒十萬騎鳴鏑揚塵遶雪
山烽火甘涼照飛幟天子仰觀天上文左樞太乙
相聯次王良策馬下奎壁傳說騎箕向燕冀徵應何
須太史古羽林已顯文昌異虎符塞外命將軍禁中
誰可叅謀議南都少宰玉堂賓讀書萬卷明天人六

韜不數孫吳學興地山川常具陳瀚海狼居若親歷
朔方河套咸留神綠邊諸鎮苦卑弱糧餉不救三軍
貧調操按伏盡搔擾丁男老弱愁傾困策命公歸佐
司馬秋風吹履上星辰佩劍豈學一人敵願輸贊畫
宏經綸海內人才元不乏江湖關析多沉淪薦引肯
如蕭相國淮陰寄食皆名臣況今養士二百年文紳
武弁生才賢一朝共試雲臺上坐令匈奴迴控弦人
言經術未足信詩書卻穀終強晉被廬蒐狩那得知
一將中軍名遂振本兵運策出萬全何必彎弓蒞行
陣不獨文章爲國華功成尚綰班超印

題五老圖壽汪尹

我昔匡廬訪竒迹五老叅差共朝夕分明蓬島隔塵
寰長天秋水芙蓉碧一朝策馬出金陵交結貴游多
上客朱門綺席列笙歌珍甘不療煙霞癖汪生昨自
池陽來手持畫圖長數尺懸我中堂得縱觀雲根山
骨多竒石菌芝靈異樹蕭森中有五老披巾幘峻嶒
古貌芟荷衣物外逍遙真自適脩然一鶴橫高空丹
砂秀頂玄霜融對之終日兩相忘恍疑身在仙人宅
生欲攜歸壽若翁若翁元是陶彭澤解綬歸來卧白
雲乃圭已煉長生液

獨樹行贈醴陵徐生

楚江東頭山色明獨樹扶疎橫紫清虬龍下瞰高人
室赤日猶聞風雨聲振衣登臺眺衡嶽洞庭瀟湘如
掌平深夜燒藜視文草鬼神走哭狐狸驚荒野荆榛
誰共賞飛霜落葉空含情屈原沉淪不可作應傍長
沙弔賈生

方山薛先生全集卷六十

詩

七言古

二石篇贈石雲廊生石洞潘生二生皆嶺南人春試下第過留都賦此爲別

嶺南石室高插天中虛巖洞生雲煙星辰錯落夫容秀少微牛女相勾連潘郎才清性好竒讀書雲洞飡菌芝秦漢文人不足數直從墳索窺黃義射策明光未得意振衣辭闕揚雙眉片帆直指石頭城龍蟠虎踞興王基同游並跳徧雄勝虹霓氣吐琳琅辭倡和

相攜頻示我錦箋翰墨爭淋漓忽復言歸愴然別更
向山中理瑤瑟海內知音自有人謝安當爲蒼生出

憶昔行送陳玉泉北上

憶昔長安四月時與君聯騎綰青絲旅進明光空獻
賦慷慨不肯求人知分曹同入司空署清才時見瑤
華辭嗟余旣出甘淪落君亦驅車向宛洛人憐子產
治刑書薦章屢上朝元閣柰何君懼棘人悲麻衣縞
帶栖林薄十年重聚在秦淮探玄觀化超墳索祗今
四月江頭擢載君復上長安道波光千里錦帆明煙
花遠近開晴嶠闔闔遙瞻日正暄五雲青瑣登英妙

酌酒勸君君自知高歌莫學新聲調

雲夢篇贈周生還楚

我方挾策游中原踰淮歷濟覽百川
遡江直至東海上窮探溟渤茫無邊
西行未經雲夢澤返櫂却逢雲夢客
瑤華玉樹照人清文章巧織天孫帛
楚中自昔號多才晉人用作諸侯伯
乃知名川代有人子今正值中興君
莊助英年嘆未逢咸陽棄繻良苦辛
一朝上書即召見風流千載爲名臣
英雄得意會有時鯢鵬不作溝中鱗
念子歸登黃鶴樓振衣且嘯湘江頭
請看滄浪豈停注應噴甘霖散九州

仲山職方奉使江漢別余於鍾陵草堂值水
南學士載酒相過遂留共飲仲山出所作雙
鴈辭見示水南即席限余用韻爲贈

使君乘傳出南國衝霜曉發鍾山前萍蹤聚散苦不
定故交方溫忽復捐君茲縱游效司馬將由彭蠡窺
澧沅余獨偃蹇卧閑署門封凍雪思袁安憶逞才華
作辭賦衆人皆怒君獨憐蹉跎歲月今老大愧逐時
輩爭新鮮凌風直欲振羽翮上下九垓橫八埏古稱
朱顏不足恃人生安得常少年願君岐路早歸宿勿
爲塵鞅相拘牽

送蔡子木刑部考績北上

詞客入長安青驅簇錦鞍春風薊門柳搖颺玉闌干
憐君十八即登庸候駕朝聽長樂鐘不謂功名猶落
窠翻從南國寄孤蹤囊琴復向都門道盡說當年漢
蔡邕上疏將陳三五法述行不踐五侯封太乙明堂
興禮樂石渠虎觀招文學君今奏績值其時召對行
將賜優渥多君念我蚤相聞我在秦淮始識君白鷺
洲前悲捉月鳳皇臺上賦停雲一朝贈別言難盡岐
路遲迴不忍分

驄馬行送張秋渠侍御北上

驄馬歸朝春欲暮楊柳飛花蒲江渡馬上仙郎服豸
冠鐵戟朱旛闢行路憶昨階前受璽書天子臨軒
意獨注頻歲匈奴寇朔方從征將士多逃亡中原要
害在齊魯密邇遼左通漁陽邇來營伍漸失次旬宣
召募徒蒼皇御史茲行徧稽閱按籍勾丁盡征發公
餘整暇且盤桓朝儻琅玕次第觀泰山梁甫縱登涉
封禪殘碑剔蘚看揮毫更和靈光賦再搜孔壁遺書
刊取道徐楊歸故里秦淮晝繡迎王官愧余寂寞非
楊雄日長空掩草玄宮憐君問奇時枉駕海岱新編
句獨工見君未幾即送君悵望關山百二重

題北泉卷

松蘿山前多白雲松蘿山北水成文中有美人築精
舍蒼麋玄鶴相爲羣飛流噴瀑濺迴欄圖書几席煙
霞寒深澗空涵石齒齒鵑鵬戢翼蛟龍蟠有時擊玉
歌滄浪山鳴谷應聲無端由來山靜泉自清山人玩
泉多得名巢由洗濯潁陽水夷齊渴飲商山泓嗟余
獨憶二三子高風千載流英聲下此唯有逍遙谷潘
郎愛泉如愛玉田生一入太白山頓移泉石膏肓間
祇今再見北泉君誰云逸駕邈難攀

黃泰泉以虎頭枕見贈戲書答謝

張紘賦瓌材蘇彥銘楠榴制器各尚象二枕皆名流
虎頭新製自何時太史貽來真絕竒書生暫假北窗
卧投筆還興定遠師

泊錢塘孔文谷偕趙艮山譚少嶠王虛齋何
鳳岡追錢驛亭鳳岡偶以疾不果至席上賦
別

錢塘雪深夜潮漲漂渺孤舟繫江上隔江遙起竹枝
歌童子垂頭黯相向五更撾鼓行將發落月迢迢限
吳越使者衝寒苦欲留臺中載酒江之郵無論太史
占星聚相看海內俱名流河汾獻策擢上第玉堂應

掌絲綸制上書自避椒房親遂作師儒範當世永寧
元是詞林器播遷再轉觀風使海上循行徧赤城搜
奇獵盡神仙秘涪州骨秀神宇清當年廷尉俱稱平
浙西載播風霜頌江左還馳翰墨聲太倉早作青雲
客吳下才華真籍籍文章切直不容時飄然復向西
陵謫貴溪先年名諫官殿前借劒毛骨寒一時偶作
相如渴致辭遣使情盤桓嗟余菲薄何足論十年通
籍猶沉淪承乏留都考功部迂踈不解識平津一朝
斥去西江上歲暮途窮唯此身近來時事多馳逐爭
尚豪華羞賤貧諸君意氣何慷慨獨在江頭送逐臣

盧冠巖司寇觴客於鳳凰臺時值春莫同許
石城何柘湖以杯中字分韻得雪字

鳳凰臺前春草歇風攪梨花亂飛雪士女初脫羅衣
裳白苧新裁光皎潔王侯賓客逐雲煙闔雞蹴鞠紛
行列盧仝攜觴招隱淪若爲人間掃炎熱酒酣擊筑
歌古辭旁人驚聽珊瑚折祇今何處有三墳不數唐
初稱四傑夜深促席情更真東方漸白難爲別

結客少年場行

長安游俠多少年意氣相高爭後先寶勒雕鞍懸赤
韉揚揚馳騁鐵連錢朝游卿相暮侯王呼酒頻過貴

戚莊招權鼓勢聳羣聽縱橫顛倒隨低昂不學灌夫
禮貧賤羞殺劇孟家無囊攫取黃金累千萬明珠華
玉盈倉箱更言富貴不足計議論文章須蓋世夜光
明月贈蘇秦李允當年善用人六國一時聲烜赫借
譽納交良有因陽翟大賈元不文召募儒生著所聞
六論八覽十二紀懸金高暴咸陽門古來英雄類如
此數墨尋行何足云

塞上曲二首

塞北風高鐵馬鳴黃蒿千尺舊秦城呼韓久識嫖姚
將不敢揚鈴擬漢旌

十五從軍學射鵬曾驅可汗拔旌旄元功次第蒙優
賞賤卒何年達漢朝

宮詞四首

昔年承寵拜昭儀內寺傳宣服鷄鶡猶記君王乘鳳
輦百官齊獻萬年卮

鴛鴦裁就剪刀寒玉漏聲沉燭淚乾更惜芙蓉花欲
謝銀燈攜出傍闌干

長門月照五更霜前殿銅龍墮玉窓夢醒鈎帷欹枕
側香爐飛翠過迴廊

朱顏自比蒹蘭幽朝對菱花半掩羞昨夜歌鐘傳

院才人新進大長秋

慈谿父老追送姚江書此諭還

谿邊有茅屋湖上有桑田從來長子孫不識縣門前
近來官府征科急時向街頭抱兒泣余亦何能寬汝
憂扶杖百里隨行舟但願汝歸訓耕織輸將剩下充
衣食

濠上曲二首

楊柳依依桑葉青蠶姑荷鋤苦娉婷爲言夫壻從征
去儂輩應湏代戶丁

兩都諸省此通衢金帛苞苴日轉輸昨夜黃河衝激

倒却教儂作築堤夫

石南豪士歌

石南豪士自何來翩翩芰荷新剪裁相逢不復詢動
定浩歌一曲臨高臺囊傾詞賦三千首覽之歷歷皆
珍瑰我謂君才李太白君言自少輕鄒枚前年驅車
出齊魯官牆直欲瞻尼父孔林寂寞梁木萎人才凋
落空懷古搜竒獵秘徧州邑山東無人可方伍中間
一二亦稱才櫟欽蒲楊何足數北游直上黃金臺公
卿貴游爭快覩伏劒不肯輕折腰有時自歌還自舞
亦恐人心如九疑不學禰衡獻鸚鵡總是長安無狹

邪人言信美非吾土振衣旋復渡江東蕭蕭一畝蓬
蒿宮圖書萬卷足自樂莫道顏回真屢空邂逅薛子
梁溪上彼此憐才涕相向一言合意如故知贈我新
詞長十丈且言平生悔遠求吾鄉自有東家丘吾聞
君言不敢當衛武九十仍追修君今別我且歸去願
君時放子猷舟

憶昔行壽王仲山

憶昔十九二十時冉涇里巷同棲遲看君意氣跨牛
斗不屑秦漢窺黃義對床論議連日夜慷慨不避庸
人嗤二泉尚書天下老謂君與我真瑰奇二三同學

皆少年詞場馳逐爭後先君操桂斧奔月殿登時奪
取高枝還我獨偃蹇寡諧合途窮不肯受人憐多君
謂我且淳畜蚤晚一發當無前未幾君擢南宮第抱
疴未對天人篇歸來江東且高卧分明平地作神仙
踰年我亦聯奏捷謂當與君同獻策詎意孤高戀故
園搜竒獵盡囊中籍摘詞不數古今人圖書直邁鍾
王跡太平 天子更臨軒君始操觚入左掖丹墀直
上萬言書展盡經綸吐肝膈賜第釋褐授司徒乞改
南宮療書癖南京司馬亦不閒守備江防煩勞劃一
考量移廣南憲疏請歸來讀周易進退盈虛夙所諳

不向舍人爭坐席偉哉令子接翼飛刺史齊東名灼
赫人言旦夕登廟廊乃翁視之如往昔君今初度七
十歲翻比當年更精粹不見嵩高太華山松栢凌霜
愈蒼翠無論黃河幾度清南極明星日相對我本衰
遲懶出門特特攜觴共君醉

題椿鶴圖壽楊三徑

開圖蒙茸椿一樹虬枝曲榦栖雲霧下有龐眉黃髮
仙坐據空山自朝暮一鶴遙從天外還歛翼脩脩向
前步人言即是三徑翁今年八十逢初度五嶽游徧
始歸來渥丹滿面顏如故囊中賸貯步虛詞笑殺向

平猶俗務昨來訪余丘園中相向尊前談夙素余今
披圖祝翁壽豈得悠悠比行路被裘拾穗善自持願
得與翁常會寤青鳥蟠桃只尺間不在瑤池在指顧
始信人間自有真扶桑少海空馳驚巴人不用當筵
歌請翁洗耳聽斯賦